

Emen Sounkadehde

Sang President Henry B. Eyring Sounsawas Keieu nan Presidensi Keieu

I kapingki ansou mwahu wet I ahniki en kosoaiiong kumwail Rahn Sarawi wet nan kapokon lap en Mwomwohdiso en Sises Krais en Souleng en Imwin Rahn Akan. Towe koaros en Mwomwohdiso wet ahnikipene malipilip sarawi wet. Kitail koaros alehda oh inouki en kapwaiada ni ansoun atail pepdaislao. Kitail ese sang ni mahsen en Alma, soukohp lap en Pwuken Mormon, dahme kitail inoukhong Koht, me iei: “[kitail] kin men mauk iang irail akan me kin mauk; ehi, oh kin kamwaiti irail akan me anahne en kin kamwaitala, oh en wia nin duwen sounkadehde kan en Koht ni ahnsou koaros oh ni mehkoaros, oh ni wasa koaros me [kitail] pahn mie lao [atail] mehla, pwe [kitail] en kak komourla rehn Koht, oh en iang tote irail akan me pahn iasada mabs, pwe [kitail] en kak ahneki mour soutuk.”¹

Met iei malipilip kesempwal ieu oh pil inou kaselel sang rehn Koht. Ahi padahk rahnwet iei mehn kangoang. Duwehte Pwuken Mormon eh kasansalehda malipilip wet ong kitail, eh pil wia mehn kaweidpatail pohn ahl me kolahng mour soutuk.

Keieu, kitail inouki en ahniki limpoak unsek. Kariau, kitail inouki en wia sounkadehdehn Koht. Oh kesiluh, kitail inouki en dadaurete. Pwuken Mormon iei mehn kaweid me keieu mwahu en kehsehkin kitail ia iratail oh duwen atail en wie mwamwahula.

Kitail tepikihda mabs limpoak unsek. I pahn katamanikinkumwail irair kei me ahpwtehn wiawi. Me tohto rehmwail iang towehda rahn en papah me ahpwtehn wiawi. Kid en soangen kemwekid pwukat koasoandi en wiawi nan sampah pwon.

Pwihn en iengomwail Souleng kan kapakapiki en ese soangen doadoahk en sawas dah re pahn wia. Re peki rehn Koht ihs me re anahne papah, soangen papah dah re konehng kihda, oh ihs me pahn iang towehda. Mwein re pil kapakapiki en dehr manokehla sapwel oh nimarail pihl. Ahpw mwohn mehkoaros, re kapakapiki me emenemen me iang kihda sawas oh koaros me alehdi sawas pahn pehmada limpoak en Koht.

I ese me kapakap kan pasapengla nan ehu wardo. Tohn mwomwohdiso epwiki riehk iang sawas. Nindoken awahte siluh, re kamwakelelda likin ehu ihmw sarawi nan aht kousapwo. E doadoahk laud oh pil kaperen. Kaunen mwomwohdisohu udahn kapingkalanganki. Koaros me doadoahkpene rahno pehmada minimin oh laudlahn limpoak. Ekei irail nda me re peren mehndahte ar wie rekrekpwel oh mwetimwet.

Mahsen sang Pwuken Mormon kawehwehda kahrepe. Nanmwariki Pensamin mahsanihong sapwellime aramasako, “Kumwail en kak esehla me ni ahnsou me kumwail kin mihla nan amwail papah kempoapkamwail akan, kumwail kin mihte nan amwail kin papah Koht.”² Oh Mormon kihda padahk wet nan Pwuken Mormon: “Limpoak unsek iei limpoak mehlel en Christ, oh e kin mihami kohkohlahte:

Oh mehmen me kin kolokol lao lel ni imwin rahno, e pahn kin mwahu ong ih.”³

Kauno pahn ketin kapwaiada Sapwellime inou ong kumwail ni amwail pil kin kapwaiada amwail inou kan. Ni amwail kin papahki mehteikan pwehki Ih, E kin ketin mweidong kumwail en pehm Sapwellime limpoak. Oh kedkedeo, kumwail apw pahn ahnekihla pepehm en limpoak unsek. Oh kumwail pahn pil kadehdehki inou en Mormon nan pein mongiongimwail ni amwail pahn nantiong papah mehteikan nan mour wet, soang koaros pahn mwahu rehmwail.

Duwehte amwail inou ong Koht me kumwail pahn limpoak unsek, kumwail pil inouki en wia Sapwellime sounkadehde wasa koaros kumwail pahn mihibe nan mourwet. Oh pil pwurehng, Pwuken Mormon iei sounkaweid me keieu mwahu me I ese pwehn seweseikitail kolokol inou wet.

Pak ehu I luk en kapahrek ni kesepwil en ehu university. President en sukuhlo mwahuki President Gordon B. Hinckley en kapahrek, ahpw e sohte kak. Eri ngehi me uhd ale luhko. Ansouo I wia emen me pwulopwul nan pwungen Pwihn en Wahnpoaron Ehk Riemono.

Lih me lukeie en kapahreko ekis pwunodada ni eh esehda duwen ahi pwukoa en Wahnpoaron. E koalie nan delepwohn oh dene eh wehwekidahr me ahi pwukoa iei en wia emen sounkadehdehn Sises Krais.

E ndahiongie ni ngihih kehlail me I sohte kak wia mwo nan ahi kapahreko. E kawehwe me sukuhlo kin wauneki tohn mwomwohdiso koaros sohte lipilipil, iangahki irail me sohte kamehlele me mie Koht. E pil pwurehng nda, “Ke sohte kak kapwaiada ahmw pwukoa malipilip wasaht.”⁴

I pwilikhdi delepwohno oh peidek tohto tang nan moangeie. I konehng ndahiong sukuhlo me I solahr pahn kapahrek? Wihkte depe luhwe mwohn kesepwilo. Re pakairkiher me I pahn kapahrek. Dahme aramas pahn medewehki Mwomwohdiso wet ma I sohte pahn kapwaiada ahi inou en kapahrek?

I kapakapkhong Koht pwehn ese dahme E ketin kupwuriki ien wia. Pasapengo kohdo. I tehkada me mehn kahlmeng mwahu en Nephi, Abinadi, Alma, Amulek oh nein Mosiah pwutangkan rasehng ngehi. Irail wia sounkadehde eimah en Sises Krais mehndahte ar kin sohpai kalokolok laud.

Eri, ihte pilipil I anahne wia iei mwomwen ahi pahn kaunopada. I onopiki laud duwen sukuhlo. Ni rahno eh kerendohr, ahi pwunod pil lalaudila oh ahi kapakap akan dindirala.

Oh raseng kamadadahn Sehd Weitahtao, I apw diarada pakair ehu sang nan ehu doaropwehn news. Sukuhlo alehier kawahu pwehki ar kin wia doadoahk en papah rasehng soahngkan me kitail kin wia nan atail Mwomwohdiso. Eri, nan ahi kapahreko I koasoaiahda dahme kiht, oh pil irail, wiahier pwehn sewese aramas paisuwed kan. I nda me I ese me Sises Krais iei utun kapai kan koaros me kohdohng nan mour en irail akan me kitail, oh pil irail, sewesehier.

Ni kaimwseklahn mihtingo, pokono kesihnendahn lopwolopw. Ipwuriamwei ahpw ekis pwunpwunodete. I tamanda dahme wiawihong Abinadi. Alma kelehpw me alehda ah kadehdeo. Ahpw nihpwongo, ni ahi iang mwengen soutik ehu, president en sukuhlo dene me nan ahi kapahreko e rongada mahsen en Koht..

Soangen pweida duwehte met sohte kin kalapw wiawi nan ahi mour en wiasounkadehdehn Krais. Ahpw duwen Pwuken Mormon ah pahn kin sair loalomw, ahmw kehl oh ahmw eimah en wie sounkadehdehn Koht, udahn pahn kin pweida. Padahngkan oh karasaras lelepengkan nan pwuhko pahn pwokada, kaweid, oh kaeimahihkumwailla.

Misineri koaros me kalohngki mware oh rongamwahu en Sises Krais, pahn paikhda ar wadek mehlel rahn koaros Pwuken Mormon. Paipa nohno kan me nannantiheng sewese nair seri emen en wehwehki Sounkomouro pahn ale sawas ni arail pahn rapahki wiepe kan me mahsen akan oh ngehn en Pwuken Mormon pahn mihla nan ihmw akan oh mouren emenememnan peneineio. Met pil pweidahr pein rehtail.

I kin kilang manaman en pai ni eh kin wiawi nan mihting en kamadipw sarawi oh kasukuhl nan Mwomwohdiso koaros me I kin iang. Sounpadahngkan oh sounkapahrengkan kin kasalehda ar pereniki oh wehwehki mwahu pwuhk sarawihkan, ahpw udahno Pwuken Mormono. Oh e sansal me pein arail kadehde kan kin kohsang nan loalen mongiongirail. Arail padahk kin wie kekehlaila oh kin kihda arail kadehde ni pil kehlail.

I pil kin kilang me kitail mwahu sang mahs ni kapwaiada kesiluhun inou me kitail wiahda ni ansouhn pepdais. Kitail inouki en pahn dadaur, en kapwaiada kosonned akan en Koht erein atail momour.

Ehu rahn I kohla ni imwen wini pwehn pas rehn emen kempoakepahi me pahn mehkihla kanser . Nei serepein tikitik riemen iangihe. I wiahki me liho sohte pahn pohneseira. Pein ah peneinei kapkapilpene ah pehro ni aht pidolong nan pereho.

Liho kilengdahte sirei. I pahn tamataman mwomwen meseo ni eh kilangada me nait serepein ko iang kiht. E oale ira en kohla mpe. Eh mwodada, , kolirahdi, oh kasamwo ira ong ah peneineio. E kosoia duwen mwahu en kisin serepein riemeno. Likamwete e kaskasamwoh serepein sohpeidi riemen.

I wiahki me aht mwemweit pahn mwadang. I medewe me eh pahn pwangadahr. Ahpw ni ei kilikilango e duwehte me liho pwulopwula. E ahniki pohn mas marain oh sansal me eh direkihla limpoak ong kiht koaros.

Liho mwomwen pereniki mehlel ansou duwehte me ansou pweiekdi. Pali laud en ah mour e kin papah Kauno ni apwapwalih serihkan. Eh wehwehki duwen soai en nan Pwuken Mormono me Kaun iasadahro ketin kapaiahda serihko koaros wad emen, oh ahpw tentenihrki sapwellime peren. Oh liho pein pehmehr pereno ni uu we me elehieng e kak dadaurete nan Sapwellime doadoahk limpoak lao lel ni imwi.

I pein kilangehr manaman kopwuriamweiohte nan perehn ohl emen me wiahier doadoahk lelepek erein ansou reirei ni uwe ehu me pein ih itarkihla eh doadoahk oh kakehr ekis kommoal.

I ese me ohlo alehdier kadoahk reirei oh kamedek pwehki soumwahu ehu me toahkte kan ndahiong ih pahn kemehla. Sohla me re kak kamwahuihkihla oh dene sohte koapwoaroapwoar luhwe.

Ahn ohlo pwoudo kahreiehla rehn ohlo nan pere ieu nan imwarao. Oh iet ih, wonohn pohn peht soanamwahu. E seht pwetepwet me ahpwtehn ain, , nektai, oh suht kapw.

Ohlo kasawihada nan meseie me i pwuriamwei, kisin kouruhr oh kawehwe, “Mwurin ahmw pahn kapaiehda, I men kaunoupadahr ong malipilip en pwekada kieit oh kola doadoahk.” Ni mehlel, ohlo kaunopadahr ong ah pahn tuhwong Kauno, iei Kaunohte me e kin lelepek ong wie papah.

Ohlo wia karasaras mwahu en Souleng en Imwin Rahn mehlel kan me I kin kalapw tuhweng mwurin ar kidahier mour en doadoahk lelepek. Irail kin dadaurete kohwei.

President Marion G. Romney kawehwe ni duwe met:: “Ong emen me weliakapwalahr ni unsek, ah ineng en wia mehkan me uhwong rongamwahu en Sises Krais kin sohrala, oh ineng wet kin uhd welialihki limpoak ong Koht me iangahki koasoandi kehlail sohte wekiwekideken kolokol sapwellime kosonned akan.”⁵

iei koasoandi kehlail sohte wekiwekidek wet me kin sansal mehlel rehn tohnpadahk kan en Sises Krais. Duwehte lih me kasamwoh nei serepein ko oh ohl me suhtki suht kapw pwehn onop en pwourda oh aluhki Kauno, irail kin idawehn Sapwellime kosonned lao lel ni imwi. Kumwail koaros kilangehr duwen met.

Kumwail kak pilehu kilangada nan Pwuken Mormon. Lel met I kin pein pehmada kalahngan nan mohngiongi ansou koaros me I kin wadek mahsen pwukat sang rehn emen tohndoadoahk en Koht me mahlahr ahpw lelepek: “Pwe ansou wet, paliwereiet unsek kin rerrer kouwahlapi ni ei kin song en koasoai ong kumwail; ahpw Koht … ketin seweseie, oh ketin mweidohngiehier pwe I en koasoaieng kumwail.”⁶

Kumwail pahn kak pereniki, duwehte ngehi, karasaras mwahu en dadaurete lel imwi sang Moroni. E kelekelehpw nan ah doadoahk. E wehwehki me imwin ah mour kerendohr. Ahpw rong mahs dahme e ntingihdi ong ni kamwahupen aramas akan me saik ipwidli oh kadaudoken ah imwintihi kan, me mahsanah: “Eri, kohdo rehn Krais, oh en unsekala reh, oh soikala mehkoaros me sohte kin kekeid nin duwen Koht; oh ma kumwail pahn kesehla mehkoaros me sohte kin kekeid nin duwen Koht, oh poakohng Koht uhwen amwail kak, ni lamalam unsek, oh ni kehl unsek, eri sapwellime kalahngano en kin konehng kumwail, pwe sang ni sapwellime kalahngan me kumwail en unsekala rehn Krais.”⁷

Moroni kihda kadehde wet nin duwen kaimwseklahn kapahrek en ah mour oh kalohk. E kangoangekin kitail duwen limpoak unsek, duwehte soukohp akan nan Pwuken Mormon. E kihda pein ah kadehde en Sounkomouro ni ansou me edin mehla kerendohr. Ih emen serien Koht me

weliakpwala, duwen me kitail pil kak wia:: diren limpoak unsek, lelepek oh eimah nan eh wia sounkadehdepen Sounkomouro oh Sapwellime rongamwahuo, oh e koasoanehdier me e pahn dadaurete lao lel ni imwi.

Moroni padahkiong kitail dahme kitail anahne wia. E nda me sokosok keieu ong weliakpwala unsek iei pwoson. Atail onopiki Pwuken Mormon ni kapakap pahn kairada pwoson Koht Sahmo, sapwellime Iehros Kempoa, oh Sapwellime rongamwahu. E pahn pil kairada rehmw pwoson sapwellimen Koht soukohp akan en mahs oh pil mwehi wet.

Ke pahn karanihkhong Koht pwuhko, laud sang pwuhk teikan. E kak kawekala ong mwahu mour en aramas. I kangoange kumwail en wia dahme emen iengei misineri wia mahso. Ansou meh tangasang pein ihmweo ni eh wia mwahnakapw men, aramas emen kihdi Pwuken Mormon nan kohpwa ehu me e kin kolokol oh weuwa ni eh kohla repenseli mour peren.

Sounpar kei doula powe. E keskeseuseli nan sampah. E kelehpw oh nsensuwed ehu rahn ni eh pa kilangada kohpwaho. Kopwaho direki dipwisou kan me e weswesikseli. Nan kapin kohpwaho, e diarada Pwuken Mormono. E wadekada inou loale oh sohngada. E wehwehki me e mehlel. Kadehdeo kawekala ah mour. E diarada peren laud sang me e kak medewehda.

Mwein pein noumw Pwuken Mormono pil rirsanguhkehr oh ke sohte nohn kin wie wadewadek pwehki kedirepw kan en mour oh sampah. I peki rehmwail ni ngidingid en menlau onopiki mehlel kan sang nan pwuhk wet. E audaudiki unsekpen rongamwahu en Sises Krais, me iei ihte ahl me kolahng rehn Koht.

I kihong kumwail ahi kadehde mehlel me Koht ketin ieias oh pahn ketin sapeng amwail kapakap akan. Sises Krais iei Sounkomourpen sampah. Pwuken Mormon iei sounkadehde mehlel me E ketin ieias oh me Ih atail Sounkomour ieias oh iasadahro.

Pwuken Mormon iei sounkadehde mehlel en Sises Krais. Ni mwahr sarawi en Sises Krais, ahmen.

Iren Sawas Akan

1. Mosiah 18:9.
2. Mosiah 2:17.
3. Moroni 7:47
4. Tehk 3 Nephi 17:21–22.

5. Marion G. Romney, nan Conference Report,

Oaktahpe 1963, 23

6. Mosiah 2:30

7. Moroni 10:32.